

Na osnovu člana 20. stav 1. alineja 1. Zakona o Univerzitetu u Tuzli ("Službene novine Tuzlanskog kantona" broj: 13/99, 12/00, 2/02, 10/02, 11/03, 8/04, 6/05 i 10/06), člana 203. stav 1. tačka 1. i člana 310. Pravila Univerziteta u Tuzli (Prečišćeni tekst), a na prijedlog Senata broj: 03-1700-14/08 od 02.04.2008. godine, Upravni odbor Univerziteta u Tuzli na sjednici održanoj 26.09.2008.godine, donio je

P R A V I L N I K

o dodjeli počasnog zvanja profesor emeritus

Član 1.

Ovim Pravilnikom utvrđuju se uslovi, način i postupak dodjele počasnog zvanja profesor emeritus kao i prava koje to zvanje daje izabranom kandidatu, na Univerzitetu u Tuzli (u daljem tekstu: Univerzitet).

Član 2.

Univerzitet dodjeljuje počasno zvanje profesor emeritus dva puta godišnje, a po ukazanoj potrebi, odnosno kada za to postoji naročito opravdan interes Univerziteta.

Član 3.

Fakultet/Akademija Univerziteta dužna je voditi računa o tome kada pojedini od njegovih profesora odlazi u mirovinu, te s tim uskladi svoj prijedlog za dodjelu zvanja profesor emeritus.

Član 4.

Odluku o dodjeli počasnog zvanja profesor emeritus donosi Senat Univerziteta.

Prijedlog za izbor u zvanje profesor emeritus Senat razmatra, odnosno dodjeljuje jednom u toku godine.

Naučno-nastavna vijeća Fakulteta/Akademije podnose prijedlog za dodjelu počasnog zvanja u pravilu na početku godine.

Član 5.

Kandidat za dodjelu zvanja profesor emeritus mora imati posebne zasluge za razvoj Fakulteta, odnosno Univerziteta kao i da ispunjava uvjete utvrđene ovim Pravilnikom.

Član 6.

Fakultet/Akademija, u sastavu Univerziteta može predložiti penzionisanog nastavnika za izbor u zvanje profesor emeritus ako ispunjava slijedeće uvjete:

1. da je izabran u zvanje redovnog profesora prije odlaska u mirovinu,
2. da je u svojstvu mentora izveo najmanje tri doktora nauka, od kojih je najmanje jedan izabrani nastavnik na istom predmetu/užoj naučnoj oblasti na kojoj je kandidat bio izabran (uvedeni nasljednik),
3. da je objavio najmanje tri naučna rada, nakon izbora u zvanje redovnog profesora.

Član 7.

Prijedlog za dodjelu počasnog zvanja profesor emeritus, Naučno-nastavno vijeće Fakulteta/Akademije dostavlja Senatu Univerziteta, ako na nastavnom predmetu/užoj naučnoj oblasti nema dovoljan broj izabranih nastavnika u aktivnom radno-pravnom statusu.

Prijedlog za dodjelu počasnog zvanja profesor emeritus može pokrenuti i nastavnik putem Naučno-nastavnog vijeća fakulteta, ukoliko ispunjava uslove utvrđene ovim Pravilnikom.

Član 8.

Uz prijedlog za dodjelu počasnog zvanja Fakultet/Akademija dostavlja i:

1. saglasnost kandidata,
2. dokaze o ispunjavanju uvjeta iz člana 6. Pravilnika,
3. biografiju kandidata,
4. popis radova.

Član 9.

U slučaju jednakih uslova utvrđenih primjenom člana 6. ovog Pravilnika, prednost će imati kandidat koji je obnašao dužnost prorektora ili dekana Fakulteta/Akademije.

Član 10.

Po prijemu prijedloga iz člana 4. stav 3. ovog Pravilnika, Senat imenuje Komisiju za ocjenu prijedloga od najmanje tri, a najviše pet redovnih profesora, od kojih je najmanje jedan član Komisije nastavnik drugog univerziteta, izabran u zvanje redovnog profesora.

Član 11.

Komisija iz člana 10. ovog Pravilnika podnosi pismeni Izvještaj, s prijedlogom, Senatu Univerziteta u roku od 30 dana od dana imenovanja.

Izvještaj mora biti potpisan od strane svih članova Komisije.

Član 12.

Svim umirovljenim rektorima Univerziteta u Tuzli, kao i članovima Akademije nauka i umjetnosti BiH bit će, uz njihovu saglasnost, dodijeljeno zvanje profesor emeritus posebnom odlukom Senata.

Član 13.

Profesor emeritus može učestvovati u izvođenju nastave na dodiplomskom i postdiplomskom studiju, biti član komisije u postupcima izbora nastavnika u naučno-nastavna zvanja, biti član Komisije u postupcima za sticanje naučnog stepena magistra, odnosno doktora nauka, te može biti imenovan za mentora pri izradi magistarskog i doktorskog rada, s tim da ne može biti mentorom na izradi dvije doktorske disertacije istovremeno.

Član 14.

Osobi kojoj je dodijeljeno zvanje profesor emeritus pripada naknada za učestvovanje u izvođenju naučno-nastavnog rada iz člana 13. ovog Pravilnika, u iznosu utvrđenom aktima, odnosno odlukama Univerziteta.

Član 15.

Ovaj Pravilnik stupa na snagu osmog dana od dana objavljivanja na oglasnoj ploči Univerziteta i organizacionih jedinica.

Član 16.

Postupci i načini dodjele počasnog zvanja profesor emeritus započeti prije stupanja na snagu ovog Pravilnika, okončat će se pod uslovima, na način i po postupku utvrđenom Pravilnikom o dodjeli počasnog zvanja profesor emeritus broj: 04-751/03-4 od 07.02.2003. godine.

Član 17.


Stupanjem na snagu ovog Pravilnika prestaje primjena Pravilnika o dodjeli počasnog zvanja profesor emeritus broj: 04-751/03-4 od 07.02.2003. godine.

UNIVERZITET U TUZLI

Broj: 04-7130-4/08.

Tuzla, 26.09.2008. godine

PREDSJEDNICA
UPRAVNOG ODBORA


Gergić Hamšija, dipl.pravnik

Ovaj Pravilnik objavljen je na oglasnim pločama Univerziteta i organizacionih jedinica dana 03.10.2008. godine.